

## Šta treba uraditi ako neko na poslu ima COVID-19

Ako neko na poslu ima COVID-19 ili je možda bio izložen virusu, morat ćete odmah slijediti korake u nastavku. Ne čekajte da se potvrdi da li ta osoba ima COVID-19.

Ove informacije će vam pomoći na radnom mjestu. Međutim, uvijek morate slijediti savjete [Ministarstva za zdravstvo u svojoj državi ili teritoriji \(state or territory public health department\)](#).

Ako neko ima ozbiljne simptome kao što je otežano disanje, nazovite 000.

### 1. Izolirajte tu osobu

Izolirajte tu osobu od drugih. Morate pružiti toj osobi kao i bilo kome drugom ko pomaže toj osobi, odgovarajuću osobnu zaštitnu opremu kao što su jednokratna hirurška maska i sredstvo za dezinfekciju ruku.

### 2. Potražite savjet i procijenite rizike

Potražite državne zdravstvene savjete od vaše [državne ili teritorijalne službe za pomoć \(state or territory helpline\)](#), ili od Nacionalne linije za pomoć u vezi koronavirusa (1800 020 080).

Pobrinite se da imate podatke za kontaktiranje te osobe. Zabilježite mjesta na kojima je ta osoba bila na radnom mjestu, s kim je bila u bliskom kontaktu i koliko dugo je bila, kako bi vas mogli informisati o rizicima za druge i područjima koja treba očistiti i dezinficirati.

Možda ćete također morati obavijestiti svoju [državnu ili teritorijalnu službu za regulaciju zdravlja i sigurnosti na radu \(state or territory work health and safety regulator\)](#).

### 3. Prevoz

Pobrinite se da ta osoba ima prevoz do kuće, mjesta za izolaciju, ili do medicinske ustanove, ako je potrebno. Kadgod je moguće, trebalo bi koristiti osobni način prevoza kako bi se umanjila izloženost drugima.

#### **4. Očistite i dezinficirajte**

Zatvorite sva mjesta koja je ta osoba koristila dok se ne očiste i dezinficiraju. Otvorite vanjska vrata i prozore ako je moguće da se poveća protok zraka.

Detaljno očistite i dezinficirajte prostore i opremu koju je ta osoba koristila, kao što je kancelarija, kupatilo, kuhinja i zajedničke prostorije.

Čistači moraju nositi odgovarajuću osobnu zaštitnu opremu, na primjer, rukavice, zaštitne naočale i kećelju za jednokratnu upotrebu.

#### **5. Utvrdite koji su bliski kontakti i recite to**

Državne i teritorijalne jedinice za javno zdravstvo identificirat će bliske kontakte za potvrđeni slučaj COVID-19 i obavijestit ih šta trebaju uraditi.

Utvrdite s kim je osoba bila u bliskom kontaktu na radnom mjestu i koliko dugo je bila kao i gdje su bliski kontakti te osobe bili na radnom mjestu.

Tako ćete dobiti informacije o mogućim rizicima za druge i dodatnim područjima koja će možda zahtijevati čišćenje i dezinfekciju.

#### **6. Ocijenite kontrolu upravljanja rizikom**

Ocijenite kontrole upravljanja rizikom od COVID-19 uz konsultacije s radnicima i procijenite da li su potrebne promjene.

#### **Koraci koje treba preduzeti kada je osoba za koju ste zabrinuti nedavno bila na vašem radnom mjestu**

Osoba koja je nedavno bila na vašem radnom mjestu, na primjer radnici ili kupci, može vas obavijestiti da možda ima COVID-19. Razmislite koliko je nedavno ta osoba bila na vašem radnom mjestu i da li je imala bliski kontakt sa drugima.

Čak i ako se ta osoba trenutno ne nalazi na vašem radnom mjestu, možda ćete još uvijek morati slijediti gore navedene korake. Potražite savjet od [službe za pomoć svoje države ili teritorije \(state or territory helpline\)](#).

## **Moram li zatvoriti radilište?**

Ne postoji automatski zahtjev za zatvaranje nakon sumnje ili potvrđenog slučaja COVID-19. Možda je to nepotrebno ako je osoba posjetila samo dijelove vašeg radilišta ili ako zdravstveni službenici savjetuju da je rizik od toga da su drugi izloženi mali.

Da li se vaše radilište treba zatvoriti ovisi o faktorima kao što su veličina prostora, priroda posla, broj ljudi i osumnjičenih područja zagađenja.

## **Kada se radnici mogu vratiti na posao nakon oporavka ili karantina?**

Radnici koji su bili izolirani nakon pozitivnog testa na COVID-19, mogu se vratiti na posao tek nakon što se utvrdilo da su potpuno oporavljeni i očišćeni od strane zdravstvenih zvaničnih stručnjaka.

Radnici kod kojih se nisu pojavili simptomi za vrijeme karantina mogu se vratiti na posao nakon perioda od 14 dana. Nije im potrebno medicinsko odobrenje da bi se vratili na posao.

## **Više informacija**

Za više informacija, idite na [Safe Work Australia website](https://www.swa.gov.au/coronavirus).